

Permintaan domestik pemacu pertumbuhan

Kuala Lumpur: Kerajaan akan terus meningkatkan usaha membina daya tahan dan meningkatkan sumber pertumbuhan dalaman dengan permintaan domestik kekal sebagai pemacu utama pertumbuhan pada 2020.

Menteri Hal Ehwal Ekonomi, Datuk Seri Mohamed Azmin Ali berkata, perbelanjaan isi rumah akan terus disokong pertumbuhan upah dan prospek pekerjaan yang menggalakkan.

“Sejajar inisiatif Malaysia @Work diumumkan dalam Belanjawan 2020 Oktober lalu dengan jumlah peruntukan RM6.5 bilion untuk lima tahun akan datang, ia bertujuan mewujudkan lebih banyak peluang pekerjaan untuk belia dan wanita.

“Selain itu, ia bertujuan mengurangkan kebergantungan terhadap pekerja asing berkemahiran rendah,” katanya.

Menurutnya, peningkatan kadar gaji minimum kepada RM1,200 bermula 1 Januari nanti di 57 bandar



MOHAMED Azmin

seluruh Malaysia, selain program pindahan tunai, pengembalian cukai pendapatan dan kos pinjaman lebih rendah juga dijangka memberi dorongan tambahan kepada perbelanjaan isi rumah.

Sementara itu, Mohamed Azmin berkata, dalam memastikan pembangunan ekonomi tidak berpusat secara geografi, kerajaan akan meningkatkan aktiviti ekonomi di lokasi terpilih berdasarkan kekuatan dan keunikan setiap kawasan.